

Na osnovu člana 19. stav (2) Zakona o Vladi Federacije Bosne i Hercegovine („Službene novine Federacije BiH“, br. 1/94, 8/95, 58/02, 19/03, 2/06 i 8/06) i člana 13. stav (2) Uredbe o načinu finansiranja i upravljanja Garantnim fondom („Službene novine Federacije BiH“, broj: 44/20), Vlada Federacije Bosne i Hercegovine, na 267. sjednici, održanoj 27.05.2021. godine, donosi

**ODLUKU  
O USVAJANJU KREDITNO GARANTNOG PROGRAMA ZA IZVOZNIKE**

**I.**

Usvaja se Kreditno garantni program za izvoznike (u daljem tekstu: Program).  
Program iz stava (1) ove tačke nalazi se u prilogu ove odluke i čini njen sastavni dio.

**II.**

Ukupan iznos garancija po ovom Programu koje će na teret Garancijskog fonda izdavati Razvojna banka Federacije Bosne i Hercegovine iznosi 100.000.000,00 KM, umanjen za iznos garancija koje su izdate do 31.05.2021. godine po osnovu Kreditno garantnog programa za izvoznike („Službene novine Federacije BiH“, broj: 65/20). Ukupan iznos garantovanih obaveza Fonda prema jednom poduzetniku ili grupi povezanih poduzetnika ne može biti veći od 5 mil. KM. Garancija Fonda za pojedinačni kredit iznosi 50% iznosa glavnice kredita, ali ne više od 3 mil. KM.

**III.**

Nadzor namjenskog korištenja i urednu otplatu kredita za koje su date garancije Garantnog fonda će vršiti Razvojna banka Federacije Bosne i Hercegovine u saradnji sa komercijalnim bankama. Razvojna banka Federacije Bosne i Hercegovine je dužna, na kvartalnoj osnovi, u roku od 60 dana po isteku kvartala, izvještavati Federalno ministarstvo finansija/financija, resorna ministarstva i Federalno ministarstvo energije, rudarstva i industrije, kao predlagača Programa, u skladu sa Programom.

**IV.**

Za realizaciju ove odluke zadužuju se Federalno ministarstvo finansija/financija, Razvojna banka Federacije Bosne i Hercegovine i Federalno ministarstvo energije, rudarstva i industrije, svako u okviru svoje nadležnosti.


**V.**

Ova odluka stupa na snagu narednog dana od dana objavljivanja u „Službenim novinama Federacije BiH“, a primjenjuje se od 01.06.2021. godine.

V. broj: 894 /2021  
27.05.2021. godine  
Sarajevo



---



Bosna i Hercegovina  
Federacija Bosne i Hercegovine  
Federalno ministarstvo energije, rudarstva i industrije  
Mostar

**KREDITNO GARANTNI PROGRAM  
ZA IZVOZNIKE**

Mostar, 2021. godine

## **I. UVOD**

Kreditno garantnim Programom za izvoznike (u daljem tekstu: Program), definišu se zakonodavni okvir, cilj, namjena, korisnici Programa, uslovi izdavanja, raspoloživa sredstva, procedura izdavanja garancije i kriteriji, namjensko korištenje, kao jedna od mjera pomoći Vlade Federacije Bosne i Hercegovine izvoznim privrednim društvima i privredi u cjelini. Program se odnosi na način izdavanja garancija iz sredstava Garancijskog fonda (u daljem tekstu: Fond), izvozno orjentisanim privrednim društvima, u uslovima potencijalnih rizika.

Sredstva za provođenje i realizaciju Programa su obezbjeđena kroz Garancijski fond (u daljem tekstu: Fond), kojim upravlja Vlada Federacije Bosne i Hercegovine i administrira Razvojna banka Federacije Bosne i Hercegovine. Fond je uspostavljen na osnovu Zakona o ublažavanju negativnih ekonomskih posljedica („Službene novine Federacije BiH“, broj 28/20), a Razvojna Banka Federacije Bosne i Hercegovine u ime i za račun Federacije Bosne i Hercegovine, provodi postupak izdavanja garancija Fonda, izvršava obaveze po osnovu izdatih garancija, vrši izvještavanje, kao i druge poslove shodno odredbama Uredbe o načinu finansiranja i upravljanja Garancijskim fondom („Službene novine Federacije BiH“, broj 44/20).

## **II. ZAKONSKI OSNOV**

- Zakon o Vladi Federacije Bosne i Hercegovine („Službene novine Federacije Bosne i Hercegovine“, br. 1/94, 8/95, 58/02, 19/03, 2/06 i 8/06);
- Uredba o načinu finansiranja i upravljanja Garancijskim fondom („Službene novine Federacije Bosne i Hercegovine“, broj 44/20);

## **III. CILJ PROGRAMA**

Osnovni cilj Programa je da se u uslovima otežanog poslovanja obezbijedi podrška privrednim društvima izvoznicima u smislu jačanja kreditnog potencijala izvoznika koji će za rezultat imati neometan izvoz, porast izvoza i sl.

## **IV. NAMJENA SREDSTAVA PROGRAMA I TRAJANJE**

Garancije Fonda u skladu sa ovim Programom mogu se izdavati za kredite sa namjenom finansiranja tekućih sredstava i/ili za finansiranje stalnih sredstava.

Pod tekućim sredstvima u smislu ovog Programa podrazumijeva se finansiranje tekuće likvidnosti (isplate plata, plaćanje poreza i doprinosa i sl.) i finansiranje obrtnih sredstava (plaćanje obaveza prema dobavljačima, nabavka repromaterijala, zaliha, sirovina i sl.).

Rok otplate kredita je do 60 mjeseci, uključujući grace period do 12 mjeseci.

Pod stalnim sredstvima u smislu ovog Programa podrazumijeva se dugoročno finansiranje nabavke opreme, izgradnje/renoviranja i adaptacije objekata i sl. a sve u cilju:

- a) pokretanja novih poslovnih aktivnosti i rast i razvoj postojećih;
- b) povećanja konkurentnosti,
- c) razvoja i uvođenja inovacija,
- d) novog zapošljavanja (ukoliko je vezano za novu investiciju).

Rok otplate kredita je do 120 mjeseci, uključujući grace period do 24 mjeseca.  
U strukturi odobrenog kredita, do 30% se može odnositi na finansiranje tekućih sredstava.

Garancije Fonda ne mogu se izdavati za kredite namijenjene za:

- a) kupovinu zemljišta i poslovnih prostora;
- b) kupovinu poslovnih udjela ili dionica;
- c) finansiranje transakcija između korisnika kredita i sa njim povezanih lica;
- d) refinansiranju postojećih kreditnih obaveza i obaveza po osnovu finansijskog lizinga;
- e) finansiranje djelatnosti kao što su:
  - i. proizvodnja duhana i destiliranih alkoholnih pića, te povezanih proizvoda i trgovina njima,
  - ii. igre na sreću, kockanje, klađenje i kasina,
  - iii. proizvodnja oružja i municije,
  - iv. trgovina na veliko i malo,
  - v. iznajmljivanje i davanja u zakup (lizing) automobila i motornih vozila (rent-a-car).

Ovaj Program će se primjenjivati od 01.06.2021. godine.

## **V. KORISNICI PROGRAMA**

Program se odnosi na izdavanje garancija za kreditna sredstva preduzećima, izvoznicima. U ovom slučaju korisnik može biti svako privredno društvo koje je ostvarilo najmanje 30% izvoznog prihoda u poslovnim prihodima prethodne finansijske godine za koju su dostupni službeni godišnji finansijski izvještaji društva.

Pravo na izdavanje garancija po Programu imaju privredna društva definisana u skladu sa Zakonom o privrednim društvima („Službene novine Federacije BiH“, broj 81/15) sa sjedištem u Federaciji BiH, koja obavljaju proizvodnu, uslužnu ili dr. djelatnost.

Podnosioci zahtjeva za izdavanje garancija po Programu ne mogu biti privredna društva u stečaju ili privredna društva nad kojima je pokrenut stečajni postupak ili postupak likvidacije, privredna društva koja podliježu neizvršenom nalogu za povrat sredstava, kao ni javna preduzeća bilo kojeg nivoa u Federaciji Bosne i Hercegovine.

Garancije Fonda ne mogu se izdavati korisnicima kredita koji:

- a) imaju dospjele a neizmirene obaveze po osnovu doprinosa, direktnih i indirektnih poreza, a za koje nisu zaključeni sporazumi o obročnom plaćanju duga i/ili koji uredno ne izmiruju dospjele obaveze po sporazumu;
- b) su isplatili dobit, odnosno dividendu u periodu od 29.02.2020. godine do 30.06.2021. godine ili u bilo kojem drugom periodu od 12 mjeseci prije podnošenja zahtjeva za kredit koji se podnosi nakon 30.06.2021. godine u postotku većem od 50% od ukupnog iznosa dobiti, odnosno dividende, osim ako je dividenda isplaćena u dionicama korisnika kredita;
- c) su dužnici, sudužnici ili jemci po drugim kreditima ili finansijskom lizingu koji nisu raspoređeni u nivo kreditnog rizika 1 ili 2;
- d) su u većinskom vlasništvu članova Parlamentarne skupštine Bosne i Hercegovine, Vijeća ministara Bosne i Hercegovine, Parlamenta Federacije Bosne i Hercegovine, Vlade Federacije Bosne i Hercegovine, Uprave i Nadzornog odbora Razvojne banke Federacije Bosne i Hercegovine.

## **VI. RASPOLOŽIVA SREDSTVA**

Ukupan iznos garancija koje se mogu izdati po ovom Programu je 100.000.000,00 KM, umanjen za iznos garancija koje su izdate do 31.05.2021. godine po osnovu Kreditno garantnog programa za izvoznike („Službene novine Federacije BiH“, broj 65/20). Ukupan iznos garantovanih obaveza Fonda prema jednom poduzetniku ili grupi povezanih poduzetnika ne može biti veći od 5.000.000,00 KM. Garancija Fonda za pojedinačni kredit iznosi 50% iznosa glavnice kredita, ali ne više od 3.000.000,00 KM. Za kredite koji budu odobreni sa valutnom klauzulom u nekoj stranoj valuti, garancija Fonda se može izdati samo za kredite uz valutnu klauzulu za EUR. Krediti za koje se izdaju garancije Fonda moraju imati utvrđen raspored otplate, uključujući redovne jednake mjesečne otplate i/ili jednokratne otplate.

## **VII. PROCEDURA IZDAVANJA GARANCIJE**

Privredno društvo podnosi zahtjev za odobravanje kredita uz garanciju Fonda komercijalnoj banci.

Pored Zahtjeva za odobravanje kredita, klijent je dužan dostaviti dokumentaciju koju od njega traži komercijalna banka u cilju utvrđivanja kreditne sposobnosti, te ispunjavanja uslova u skladu sa Uredbom, Programom i zaključenim ugovorom o poslovnoj saradnji sa Razvojnou bankom Federacije Bosne i Hercegovine.

Komercijalna banka u skladu sa svojim internim aktima procjenjuje kreditnu sposobnost korisnika kredita, određuje kamatnu stopu, te procjenjuje i dogovara instrumente osiguranja, uz uslov da se mjenice tražioca kredita mogu prihvatiti kao jedini instrument obezbjeđenja kredita, pored garancije Fonda, za kredite do visine od 500.000,00 KM.

Po odobravanju kreditnog zahtjeva od strane komercijalne banke, ista šalje odluku o kreditu prema Razvojnoj banci Federacije Bosne i Hercegovine sa zahtjevom za izdavanje garancije Fonda. Pravo na garanciju ne postoji, već Razvojna banka Federacije Bosne i Hercegovine o svakom zahtjevu donosi pojedinačnu odluku nakon provjere ispunjavanja uslova propisanih Uredbom, Programom i ugovorom o poslovnoj saradnji zaključenim sa komercijalnom bankom, u cilju izdavanja garancija Fonda.

Ukupnu finansijsku korist garancije Fonda u okviru svakog kredita, komercijalna banka prenosi na korisnika kredita u obliku smanjenja kamatne stope i/ili smanjenja kolateralala koji zahtijeva za dati kredit.

Ovim Programom je definisano sljedeće:

- Provizija za izdavanje garancije, kao jednokratna naknada iznosi 0,15% od nominalnog iznosa garancije Fonda i nju plaća komercijalna banka u ime korisnika kredita kao jednokratnu naknadu,
- Premija rizika za garancije Fonda iznosi 0,60% i obračunava je Razvojna banka Federacije Bosne i Hercegovine na nedospjeli iznos glavnice kredita za koji je data garancija Fonda za svaku godinu trajanja garancije Fonda i koju komercijalna banka plaća u ime korisnika kredita na kvartalnoj osnovi (kvartalno unaprijed tj. na početku kvartala za taj kvartal),
- Diskontna stopa za izračun državne pomoći u obliku garancije iznosi 4,56% (prosječna kamatna stopa na kredite nefinansijskim preduzećima u KM sa valutnom klauzulom preko 1 do 5 godina na dan 31.12.2020. godine, koju

objavljuje Centralna banka Bosne i Hercegovine, uvećana za 100 baznih bodova).

### **VIII. NADZOR I MJERENJE UČINAKA**

U saradnji sa komercijalnom bankom, Razvojna banka Federacije Bosne i Hercegovine nadzire namjensko korištenje i urednu otplatu kredita za koji su date garancije Fonda, te nadzire i provodi postupak povrata sredstava po osnovu plaćenih garancija Fonda, a sve u skladu sa zaključenim ugovorima o poslovnoj saradnji sa komercijalnim bankama.

Predlagač Programa će na godišnjem nivou izvještavati Vladu Federacije Bosne i Hercegovine o učincima koje su ove mjere proizvele (povećanje izvoza, učešće izvoza u ukupnom prihodu, povećanje broja zaposlenih, povećanje investicijskih aktivnosti i dr.)

### **IX. OBJAVLJIVANJE AKTA**

Ministarstvo će ovaj Program i Odluku o usvajanju Programa objaviti na web stranici Ministarstva: [www.fmeri.gov.ba](http://www.fmeri.gov.ba).

Za dodatne informacije kontakt telefon je:  
036-513-833; 036-513-808

**MINISTAR**

Nermin Džindić